

«Poz felti pulagias!» – stgatlas e stgazis

■ (cp) L'Institut dal Dicziunari Rumantsch Grischun (DRG) sa preschenta en la Biblioteca chantunala dal Grischun. L'exposiziun dat in'invista en la rinnada dal linguatg rumantsch e mussa ulteriurs stgazis or dal DRG. Il charedactor Carli Tomaschett avra l'exposiziun ils 11 da matg. En l'Institut dal DRG a Cuira vegn rimnà dapi passa 100 onns l'entir stgazi da plects dals Rumantschs. L'exposiziun en la Biblioteca chantunala dal Grischun mussa co ils plects, lur diever e lur muntada vegnan registrads e documentads en ils artitgels dal Dicziunari Rumantsch Grischun. Il resultat n'è betg mo in vocabulari, ma bain in lexicon cun descripciuns dad usits, artisanadi, medischina populara, euv.

Maletgs istorics or da l'archiv da fotografias che cumpiglia var 30 000 maletgs, il material original per la perscrutaziun da la chasa purila grischuna ed ulteriuras collecziuns cumpletteschan l'exposiziun.

A chaschun da l'avertura da l'exposiziun, ils 11 da matg 2011 a las 18.00

referescha *Carli Tomaschett*, il charedactor dal DRG, davart il tema «Il Dicziunari Rumantsch Grischun – ina chombra da stgazis da la lingua rumantscha e cultura alpina».

En il decurs da l'exposiziun dals 11 da matg fin l'october 2011 han lieu ulteriuras occurrenzas accumpagnantas. L'emprima da quellas ha lieu mardi, ils 14 da zercladur a las 18.00. Sut il titel «Dialas Ramassan Giglidras – Bergefeen lesen Preiselbeeren» baterla l'intermediatur da la cultura *Chasper Pult* davart il DRG sco funtauna dad istorias da plects.

La segunda occurrenza ha lieu ils 30 da zercladur 2011 a las 18.00 sut il titel «Amur e dolor – Lieb' und Leid». *Silvana Derungs* preschenta insaquantas ivettas amurusas e dolorusas, zipladas or dal DRG.

«Poz felti pulagias!» – stgatlas e stgazis. Exposiziun davart il Dicziunari Rumantsch Grischun (DRG) en la Biblioteca chantunala dal Grischun. 11 da matg fin october 2011.

Dapli sin www.kantonsbibliothek.gr.ch.



Il Dicziunari Rumantsch Grischun, dapli che mo in vocabulari.